



養素堂文集卷九

記三

多寶塢石記


多寶塢今呼白塢余登其巔乃知原名多寶塢也弟六層佛龕內兩壁有嵌石左刻云敷文閣直學士左中奉大夫潼川府路兵馬都鈐轄瀘南沿邊安撫使知瀘州軍州提舉學事兼管內勸農使文安縣開國伯食邑九百戶賜紫金魚袋馮今於昌州多寶塢內施錢四百貫文臣造弟六層塢一級全用銀合內盛礬嚴感應舍利一百二十粒安

養素堂文集

卷九

一

於其中祈乞祿壽縣遠進道無魔眷屬安康子孫蕃衍盡此報身同生極樂紹興壬申歲仲春旦日脩塢化首任亮棗石右刻云敷文閣直學士左中奉大夫潼川府路兵馬都鈐轄瀘南沿邊安撫使知瀘州軍州提舉學事兼管內勸農使文安縣開國伯食邑九百戶賜紫金魚袋馮大學年七十八歲男右承奉郎瀘南安撫使司主管機宜文字馮覺男右廸功郎前成都府路提刑司幹辦公事馮覺年三十歲以下皆子婦孫男女暨其子孫孀母之名與年歲也考大學南部人登景祐元年甲戌科張唐卿榜與蘇舜欽鮮于侁青陽楷等同年官爲安撫並非末秩而通志竟



無其名但載紹興時瀘南安撫使馮檄案檄幼喪父離母
寄養於人後官瀘求其母不得會誕日羣丐聚乞署門外
肉一瞥目老嫗曰吾兒生同今日若在老身不至流離如
此也家人入告檄進嫗問曰汝子生年月日能記憶否嫗
一一言之不爽又問曰身中有記否曰二子共胎連背而
生以刀分之一死一生生者脊有長痕檄下拜泣曰是吾
母也扶起薰沐焚香告天跪歸其目其目復明因建塏曰
報恩今在瀘州開福寺中是檄爲安撫使在紹興時大學
爲安撫亦在紹興時或檄即大學也又考遂寧志有馮覽
慶元五年己未曾紹龍榜特奏名或即大學子而父子乃

養素堂文集

卷九

二

異籍蜀人風俗向如此者蓋是塏原爲唐乾寧時韋君靖
所建宋紹興時重脩馮安撫特捐錢脩弟六級耳其化主
則任亮其塏塏者則道人邢信道也亦見塏內石記

游馬湖記

蜀之屏山縣爲季漢馬湖縣前漢犍道朱提二縣地犍道
故犍侯國今爲宜賓朱提縣因山爲氏山出銀銅馬湖縣
治有馬湖江爲金沙江之下流即若水又名瀘水諸葛公
渡處在此非今之瀘州湖在縣治西一百七十里黃鵠司
南五里黃鵠即漢之堂琅縣地一佗堂狼後人音訛轉爲
黃鵠謂其地出鵠譌矣其山歷屢截巢直刺層霄即酈道

元所言高山也湖踞山巔袤三十餘里廣七里餘淵深莫測去大江二百里水與江流同消長日夕作潮中有島嶼如螺髻后戴土可容四五百人俗謂之海包有海馬后水消則見者舊相傳有龍馬潛湖內亦謂之龍湖春時繫牝馬於湖側龍馬出與交則生神駒圖經言明昇據蜀所獻明太祖之飛越峯即得於此湖或云得黔南之柳坑非此湖四圍皆巉崖峭壁一縷鳥道余於辛未歲冬十一月以公事赴雷波廳抵黃螂巡檢黃君省曾言陸行奇險不如汎湖便安乃乘舟時朔風正厲波濤震盪巨魚涌躍舟若鳬雁飛浪上日未映出湖至牛咆易轎入箐口劇寒林木

養素堂文集

卷九

三

森密堅冰在樹厚寸許雪冒枝上風吹之斗出枝外寬四五寸如馬鬣魚鱗然出山則天氣和暝如二月時也按南中志朱提有大淵池水名千頃池西南二里有堂狼山多毒草盛夏之月飛鳥過之不能得去脈其道里千頃池即馬湖也蜀都賸注朱提有靈池在縣南數十里周四七里靈池即千頃池疑當日朱提縣治在今平夷司故云縣南數十里也所言廣狹微異想今筭變夏耳嗟乎造物亦太幻譎矣匡廬山頂有方池中橫大鰲水多白鷺朝那縣高山有靈湫四時不涸風吹擗入水輒有鳥銜去此皆余所目睹者其所未見夏不知幾何也

游涪翁洞記

涪翁洞在屏山縣東龍關石壁下黃魯直安置戎州時曾游憩於此明萬厯閒軍興安邊同知汪京平治道塗洞遂破毀余宰縣之二年重脩龍關因游焉青壁萬尋鴻波奔激舟泊江濤步上崖隕入其中甚庠淺洞口有記駁落不可讀旁隸書刻曰挽士不能寸推去輒數尺才難不其然有亦未易識又云面前路須常令寬路徑窄則無容身處况能使人行也下刻云右豫章黃太史詩康節邵先生語東漕舊有隸本奇特郡守臨邛黃申爲摹刻於涪翁洞側以增偉觀嘉定辛巳十月既望然余曾游宜賓涪翁谿谿

養素堂文集

卷九

四

有山山中分相去二丈所石壁刻挽士不數尺詩面前路須常令寬語款云山谷老人書蓋魯直戎州日書刻之旁高崖又鐫南極老人無量壽佛八字大徑三尺餘廣如之雄偉可喜殆是黃守以戎州刻移鐫於此也

重九日偕友人游南禪寺至玉皇觀登高記

鴻雁北來節逢九日簿書少暇選地登高城南三里有南禪寺僉曰幽勝肅駕游焉梵宇荒涼禪榻庳庳不足啣襟惟門外松檜樛樛頗堪延賞遂呼騶赴玉皇觀路漸曲仄延緣而上約里許乃至茶飲少憩入三清洞瀏覽鑿空巖石瑯鐫法像非自然者撫視洞門石上刻淳熙戊申季夏

梁當之陳應辰鮮于東老何長文

缺二字

擇趙用若避暑於

此共二十九字缺二字下刻隸書二十字筆法甚雄傑乃
譙人曹偉卿公餘侍親游此爲慶元庚申冬至雪後三日
也側面刻楷書七十字乃知昌州陳伯彊饗其先考妣者
爲乾道己丑冬至日也循視洞門左刻楷書二十三字乃
申國呂元錫挈家尋仙追涼於此爲淳熙戊戌六月十三
日也尋仙下二字爲人鑿猶可辨出洞摸左右壁屋欄遮
擁甚黝黑龔火燭之得七律詩四首倡者爲左朝請大夫
知劍州軍州事張宗彥和者爲左朝請大夫知昌州軍州
事何格非無歲月旁刻草書四行甚模糊諦視乃辛未初

養素堂文集

卷九

五

冬鄧早跋張何二公詩者知其詩作於淳熙五年六月十
二日又旁刻呂元錫挈家登南山回少憩南禪寺所作詩
下刻和韻詩署款處數十字極小不可辨仍循至右石壁
有淳熙七年冬十月大足縣令何光震同教授主簿等官
餞郡守王夢應刻石紀事者文凡六百二字刻缺者僅十
三字旁有端平二年六月六日江原樊允季領客資陽王
熙避暑於此凡三十二字數百年苔封藤覆之物一旦出
於人閒喜極欲顛如獲百馮飭吏人撤木欄洗塵土將搨
以餉知好也遂登玉皇閣石像數十斷裂橫卧轡視閣外
野煙冒樹時漏積陽孤鷺飛處白塢露尖縵田水滿皓同

積雪呼燈劇飲聯騎而歸濡墨伯記於得二詩

代朱小裴明府石盆記

余鄉富山水虞衡所誌子厚所游逸情超拔霞外寄蹤疇
咎亦思觸岫延賞傾瀾懷煙而羈於塵鞅向長笑人言念
翠巒悟衷何時拊帶自慙已頃棣園春嶼兩弟來簡云購
得巨石如盆狀廣袤七尺深二尺許可注石水中峙五峰
眞偉觀也咎嘗怪奇章好石甲乙第品何取氣核爲是靳
靳今斯石也方之到氏奇臚未知何似而辰秀浮清足以
官府風雪輸納波浪矣新楹適成寓書顏額度幾鑑此汪
汪思我叔度瞻彼巖巖儀我子輿豈必效米顛哉抑汾隅
養素堂文集 卷九

六

有言丘陵學山百川學海至不至分焉存之於畫晷又在
觀者之會心也夫

登邠州石佛寺記

邠州二十里有石佛寺余數遄來未之游今春三月將入
都補官道經幽風閣下乃躡石級登焉覽舊碑謂此寺創
於唐貞觀年州志載興工者鄂國公也其石佛像高八丈
五尺有奇浩哉工乎當日亦甚勞民力矣原佛法以施舍
因果爲說其心至於憫眾生苦難而淺者謂以象爲教遄
遄廣造精舍以紫磨爲身頗黎爲眼珊瑚爲舌飾紺青之
髮豎光明之拳龍蛇虎豹之區化爲金碧卽謂之慧門而

佛遂俛首以寶珠與盜無乃妄之甚與夫三昧四禪五戒
八空豈有異解要歸於清淨而已倘世之人不使六龍驚
軫二鼠馳光卽可以度愛河可以褰欲網豈非昏衢之巨
燭苦海之慈航乎今則誕其金剛不壞積薪不焚薦以伊
蒲飯以香積卽能貫其宿辜是般若臺上真有陳文達矣
管丹霞禦寒則燒木佛德山說法則撤塑像空門之有識
者尚不以土木爲事而儒者反或信之余平生不喜何充
之佞佛亦不佞范縝之無佛論而犇走塵途煩惱殆甚思
於婆羅樹下一蔭清涼詎必向苦行林中飽麁蜜哉然三
獸渡河而喻有淺深吾甚鄙夫蕭瑀之聖之也試詰佛曰

養素堂文集

卷九

七

子疲于津梁以身世爲妄是選佛不如選官也恐如毘羅
之石亦不能量畬迨然一笑登車而去宿旅次而爲之記

游玉泉院記

嘉慶庚申三月余自家將還京供職四月抵青門偶病肝
鬱友人朝邑王葵圃茂才言玉泉院邃幽清敞可避蹕曷
遷彼靜養疾當速痊余曰善乃於四月中旬膏車造山麓
稅於前院邀寧陰馬指擲伯雅其弟茂才仲循潼關劉瑞
符副貢湖北劉俠君上舍與葵圃同憩焉早睡初醒呼僮
啓牖則靈鳥仙蝶聯翩入房翔飛旋轉或止几上不畏人
良久乃去盥畢則烹茶於山菴亭卽後則讀書於挹翠軒

正午則芻葦於眺遠堂稍倦則卧於希夷洞夕則望月於
無憂樹前暇則入竹林觀飛颺之翹翹熱則濯浴於玉女
泉泉源出西峯之玉女洗頭盆自山峽流入院後爲方池
鑿龍首水出龍口溢爲塘芙蕖叢生石船浸焉有時賸詩
則列坐其中入夜坐院清暑見星月皆大光照須眉面地
下水聲琮琤然時或出後門望嶽見白雲縈山腰如帶轉
瞬則雷霆辟廬山上大雨山下仍驕陽也昕夕瀏覽病霍
然脫流連久駐不忍別去一日與俠君較射山門外有蒼
松四五株高皆五十餘丈北周時物也俠君曰君能挽彊
試射矢踰松頂信能射矣余以鏃矢射之箸於松首本入
養素堂文集

卷九

八

寸許後七年自黔回里復入都往游舊地見矢猶在松上
也遂追爲之記

游嶠山記

爾雅釋山河南嶠周禮職方河南豫州山鎮曰嶠山崑殷
周時嶠屬豫雍州之鎮則曰嶽即汧之吳嶽也嶠今爲秦
望余往來京師至嶠陰縣遙望三峯未嘗一登陟也嘉慶
庚申四月養疴玉泉院在山之麓時欲登椒而憚其峻恐
發昌黎之慟遲回者久之屆五月歛蒸擬到落雁峯游暑
劉瑞符副貢王葵圃茂才謂余有濟勝具憇憇之乃儲肉
脯糗糈酒米以十六日戒塗跣布鞋蹠上纏膝頭戴笠腰

繫布二丈許俾人挽曳行四十里至青柯坪宿焉夜靜時
聞鳥聲泉響步廣庭星縣樹杪銀河挂檐際月大如盤金
波欲瀉信靈境也詰朝路險不能緯緩步行徑益峭歷百
尺幢千尺幢蒼龍嶺鐵絙直挂攀之而上隨長短皆可受
趾幽窅深壑窺不見底水激石爲雷霆風入松作江濤蓋
廩廩乎眩欲顛也洎上南峯回睇西峯仙掌赤壁霞駁高
擎九霄想見巨靈鼎鳳之烈郛道士延駐精廬月上觀諸
穹碑不火而明次日至玉女洗頭盆無所謂十丈蓮萼而
清流涓涓直奔巖下因與諸友詫山之奇道士曰此不臣
奇也於東方未明看東海出日乃大奇余喜甚五鼓初卽

養素堂文集

卷九

九

披衣催諸友起急登山巔見日初出大於車輪佗紺赤色
少選則漸紅珠如毬數十百起於日下跳躍不定久之海
水瀆涌日紅如焉支又久之日漸黃毬珠隱沒遠邨雞亂
鳴天乃曉返寓道士爲煮酒呼僮磨墨伸紙欲作觀日篇
未成擲去早食後卽下山仍憩青柯坪夜太雨迅雷起屋
上棟梁震搖令人驚悸次晨晴霽澗水聲盈耳古樹翠
色滴人衣裾返至玉泉院日已曛莫得詩三十首按漢官
儀言泰山高四十里郛璞言從山下至頂四十八里三百
步明人張五典疑其誕以竹竿量之高三百六十八丈三
尺四寸折步七百三十六步六分八釐平高共積五千一

百二十步有奇實高一十四里零八十餘步耳若嶺山三
秦記言不知其高幾千仞如半天之雲山海經言削成而
四方高五千仞惜未有量之者

游平山堂記

余游平山堂者數數矣丙寅歲同揚州太守張君文靖看
重臺之蓮丁卯歲同渭源大令王君保澄拜閭部之墓戊
辰歲偕朱觀察涂吳庶子龜痛飲於倚虹園己巳歲偕陳
明府杰張布衣徵門韻於詠詩樓余時池臺駢駢亭榭藻
華萼木蔥蒨檣帆絡繹游女婉孌靚粧照水士夫姚偉歌
吹沸雲尋老漣之釣臺拜太傅之祠宇問察戰之舊巷弔

養素堂文集

卷九

十

雷塘之荒墳擧蕃釐之瓊萼買蛇市之蛟布逸興過飛粹
腳不倦今之游也與黃農邵雨田錢大使壽會同汎舟焉
墻垣淪褫竹樹蕉萃壁黏蝸殼階封蘚落柳灣之綠波不
漲桃塢之草莽已積廿四橋之笙簫蘭寂萬松嶺之梅株
摧殘但聞蠅閭閻而求廩鳥秋秋以覓蟲風蕭瑟而酸涼
日埃訢以戢景爲淒感者久之次日與俞陶泉都轉飲次
言之陶泉曰余終日籌鹽筴未嘗一商津也余曰某簪日
之游逢其盛今茲之游際其衰人世滄桑有如此者不可
以無記

嘉慶己巳歲余在都候選兩江總督百菊谿先生奏請赴李家樓河工効用時尚未動工座主文遠皋師督學江蘇書來招至常州府校文試畢將赴揚州舟抵京江大風濤遠皋師思戒榜人勿渡亭午風稍定余勸師登金山師難之同門諸友咸慫恿之乃汎舟至山麓登焉山脾鑄江天一覽四字明巡撫胡纘宗所書吾秦人也直至妙高峯少憩煎弟一泉瀹茶飲之望宰堵坡卓太雲霄和上延入禪室出蘇東坡玉帶置几上令展視曰此蘇老先生所畱鎮山門物也師微笑曰蘇老先生爲蘇學士耶和上曰非也是蘇東坡諸友皆笑余目諸友出相與依危欄看江江四

養素堂文集

卷九

士

面圍繞波鬻山根勢若浮動舊說名浮玉山唐時裴頭陀開山得金賜名金山或曰明皇改之然山海經云浮玉之山北望具區則山在具區南非金山明矣遙睇江心亂石間有叢薄雅雜棲集問之諸友咸曰卽璞墓余曰晉書卽璞傳璞以母憂去職卜葬地於暨陽去水百步人以近水爲言璞曰當卽爲陸其後沙漲去墓數十里皆爲桑田據史文謂去水百步許不在大江中且當時卽沙漲暨陽卽今江陰不在江口又所葬者璞母而非璞也璞墓在江寧卞茆湖中王鼓開視惟有短杖膝琴子鑑乞收琴杖葬之南史謂宋卞帝浚卞茆湖習水卽得璞墓遷葬之諸友曰

世之矣傳多類此正笑語聞師呼慊從還舟是夕余作四
詩句師及諸友和之次晨乃渡江憶丙寅歲余來南由蘇
州至丹徒邑令靳君金鼎延津人爲同門生在都中相識
訪之靳君以余舩小爲換大編日夕乘風泊金山下挽衣
荷笠而上造其巔洪稚存太史在焉余問前輩尙在此幾
時來洪曰余寓此游暑已月餘矣君何往余曰將赴江寧
洪曰今夕須痛飲狂歌呼風喝月醉則跳江波中尋卽景
純較戶之大小耳余笑曰前輩固豪醉則何何必求死
洪曰君思死乎余曰樹不畏死恐奇相不受前輩耳相與
奉腹笑銜杯嚙復嚙咸茗芋起則若禾黍低昂磨墨伸紙
養素堂文集 卷九

三

游焦山記

余隨遠臯師校泰州畢將謁百制軍師于金陵仍自瓜步
洲出時十月江風寥厲朔雁鳴空商榜人此去焦山幾許
榜人曰過談家洲十餘里卽是遂張帆往至山麓亂石紆
回中有平階拾級上東有長廊十數楹歷人勝坊平臺廣
數丈再進則焦山寺殿後有軒設古鼎傳爲周景王時物
無款識可辨尋磴至松寥閣少憩壁上楊椒山先生所題
絕句楊子懷人渡楊子椒山無意合焦山石刻尙在倚徙

山瞰望大海波濤浩淼回顧金山煙樹迷離不辨遂循山之西由曲磴下及江湄訪瘞鶴銘已崩摧於鴻波中過三詔洞孔孝然像得絕句云先生何避世有夢到羲皇儀頌誰髣髴幼安遼海旁尚欲瀾覽而積陽栖岫乃回舟橫京口惜未攜酒來畱宿痛飲山臬夜中聽江聲陶月色也爲悵然久之

游西湖記

嘉慶丁卯之二月二十九日舟至嘉興訪錢心梧於秋湮橋詰朝偕謁漆林先師墓淒咽良久晚到祿里街觀先師舊宅後嗣彫謝尤爲悲惻次日恬齋同年來同游駕鸞湖養素堂文集卷九

三

卽聞人滋所記南湖也中央有煙雨樓風力甚勁舩簸揚心梧思余笑曰子南人尚畏水豈能如予之汎洞庭湖耶次日邀陳妙士同年感南如上舍心梧恬齋游御萼園晴雲罨靄芳草霍靡雜萼栖樹嘯鳥呼人頓起羈思磨外蒲帆隱見一半漁歌欸乃與榔相和釐飲於馬氏晤香室蘭芬馥郁鼻觀亦香次日遂約爲西湖之游越再宿抵杭寓昭慶寺心梧赴黃湖余偕其妻兄陳太學步湖邊登保俶塢歷萼神廟岳鄂王祠見翁覃谿先生所題銅甌詩石刻甌爲王孫珂所鑄以祀王者乃踏蘇隄白隄歸次日入城訪許周生同年張莖渠大令章子卿大使次日陟城隍山

卽吳山也觀錢塘江江波黃濁征帆杳杳如在雲際次日
心梧同同至金沙港繁華爛漫落紅滿地少選移舟至西
北岸入靈隱寺古木輪囷脩竹植纍細流鏡沙游魚可數
遂抵九里松甚熱緩緩踏莎行約十里許渡橋橋西北奇
峯突兀瓊瓏萬狀則飛來峯也周遭佛像元僧楊璉眞伽
所鑄者峯卽越紐書之龜山吳越春秋之怪山本琅邪東
莖山一夕移此故名飛來傍卽冷泉亭濯手泉邊寒沁肌
骨唐右司郎中河南元冀伯此亭或謂卽郡守相里造之
虛白亭僕射韓高之候仙亭庶子裴唐棣之觀風亭給事
盧元輔之見山亭遺址也次日欲游韜光寺看竹不果乃

養素堂文集

卷九

古

游天竺路畔多殘體人乞錢見之酸鼻至則煙氣薰灼不
可耐急返舟中至小有天園登南屏山觀司馬溫公磨崖
刻易家人卦札記札樂君子斯須不可去身一節又君子
素其佐而行一段入淨慈寺僧小顛貽之詩集出仰雷峯
塢頗巨壯輒多積落此時已夕照矣舟至白雲葦境地清
闔游人稀少登樓遐眺水上綠煙風吹乍散荇藻如絲隨
波蕩漾亦足喜也至錢菴肅祠東廡峙蘇文忠表忠觀碑
遂回寓次日汎舟至蘇白二公祠又移南岸謁于少保祠
祠去湖岸可三里許祠額曰旌忠步幽徑而出竹樹蒼翠
映人衣裾蕩舟至小孤山尋林和靖墓元時爲僧掘發棺

有端研玉簪各一枝今墓不知何處但草綠山青耳放鶴
亭豔穹碑刻鮑明遠舞鶴睢趙吳興所書山在水際大呼
笑則岸山響禽因至六一泉泉上泥草糾結水不清冽石
壁百尺多鐫詩句還至聖因寺登望湖樓匾曰吳越翰經
樓阮若臺撫卹師所建也詰經精舍在其後旁爲弟一樓
亂雅飛噪弓月桂林杪乃歸次日爲初十日余欲歸許周
生張輦渠章子卿各畱飲一日日在醉鄉不復游迨十五
日乃返構李仍買舟赴長興與心梧抗手而別

兕觥歸趙記

代陸心蘭方伯

當明之神廟江陵秉成勝算老謀海內殷富迫奪情起復

養素堂文集

卷九

五

羣賢交攻論者多咎士大夫過激昧爲國愛才之義余則
以爲身居墨經安附從戎墜先王禮蹈宰我愆諸君子之
彈章疊上所以勉子孝即所以厲臣忠而小儒過爲訾議
何哉時則常熟趙文毅公亦疏劾之受廷杖出國門許文
穆方爲庶子鐫兕觥贈行文毅旣沒其觥傳於黃端伯陳
潛夫章藻功何繼音諸人後歸曲阜顏衡齋文毅五世孫
者庭於江西學使翁覃谿宮詹許見拓本泫然乞翁爲文
致顏氏謀易之觥卒歸趙今懷來心如明府弄藏之來謁
時呈家刻兕觥歸趙詩文一冊且求爲記余觀伊古蓋臣
篤柴直亮有所論列奮不顧身逆鱗蹈刃百折不回幸而

瘠主明良相慶懼無矜色不幸遭誅或加竄逐甘飴受之
毫無憤懣未聞張綱畱輪以示後辛毗藏裾以炫人然葺
檻而念朱雲洗衣而思稽紹覩物繫懷烏能已已然則忠
臣之身騎箕尾氣侔山河而遺物遂毒比金石珍倖鼎彝
亦理之常無足怪者今夫因忤所以去者忠也因生所以
盡者孝也文毅公旣削職歸藏其膾罔示子孫而中允公
於崇禎朝復効楊嗣昌之奪情其疏有曰人才所以不振
正由愛功名薄忠孝致之又曰臣祖用賢首論故相奪情
幾斃杖下臣敢背家學負明主坐視綱常掃地哉嗚乎可
不謂世篤忠貞乎而者庭之惓惓舊物跋涉關期於必
養素堂文集 卷九

三

得以永先澤亦可謂孝思不置矣今心如牧民伯父母其
盍孟晉以繼先世之業哉

張雲麓明府寧遠宗祠碑記

式觀前古治化淳懿世風樸屬在上敦本俗之教里巷循
收族之經以故其時孝友嫻睦萃而弗睽歲時合其食吉
凶通其財葛藟無傷角弓不伯遺秉滯穗利且及於寡婦
自宗法不行俗趨澆薄舉牢褻積各殖其私相怨一方罔
聞任恤而瓶罍交恥泉池坱圻甚至杖屨瓢碗之色加於
父母嗟乎本之不固枝將就萎膏之不沃光必不燁即使
倖躋膴仕芼薦豐潔麗牲鬯毛鼎之俎之鬼神其吐此有

心者所爲蒿目而永嘆也古筑雲麓先生由進士爲江南
寧國縣令凡七季有惠政解組歸爰契地營祠爲堂三楹
翼以兩廡豁如暈如凡樹棹繚垣悉以法用以妥先靈用
以合宗邨用以示雲祏報本追遠垂諸奕禩厥意良臚顧
余嘗誦睂山蘇氏族譜記言有服者不過百人而歲時臘
社不能盡其歡欣愛洽稍遠者至不相往來念今世知收
族篤本支者蓋尠矣貧賤則骨肉交惡富貴則秦越一家
本根不庇數典殆忘張氏之子孫果能鑒凋劫之俗篤焉
奕之情愴春秋祭日合宗族子弟咸集祠宇拜奠旣畢以
次揖坐顧瞻几筵感懷風木其翔實白著者則改容懃服
養素堂文集 卷九 七

之其寔義逋蕩者則訟言獻獻之庶幾孟晉厲志集詆興
懷相與肺附以崇庸德用能保世滋大丕慰靈爽豈僅枯
櫨占護胖蠶豐融謂足以繩祖荏絛蟬嫣哉嗣子啟瓏介
李孝廉芬徵余文以勒諸樂石斯亦可謂善述先志者也
余故詮其義以爲記

岳一山舍人先墅記

嘗讀蕭仁顯言志論有云築蝸舍於叢林構環堵於幽薄
二頃以供饘粥十畝以給絲麻烹羔羊而介春酒迎伏臘
而候歲時斯亦足矣樂不可支竊念超踰世網枕藉平皋
勤是蓑蓑未易云覲繼讀漢中士女志不獨偉勛亮節濟

世之英駢肩接跡而隱君子之秉道匿暉舍和隱璞遁於
犒牛摩盪之閒殫其長兄去弟之業徠刺無數孝思靡窮
診諸舊紀求之方今則於我慎菴質齋兩封翁信之質齋
翁者吾友中書舍人一山之哲考而慎菴太翁之淑嗣也
鄂國之裔不乏壯懷蕩陰之支爰栖旱麓固非南陽樊重
世饒上腴蘄州龐安素席沃產者矣當其始以白金數笏
買吳氏曠土一許沙礫所積榛莽所封汚萊極目磽确不
毛父把鉏於前子荷耒於後爾蕪撥腐曝淤翦荒去草而
蘊崇之槩木而水火之而後霑體塗足趨耨深耕變雲雨
於黃污化膏腴於烏鹵凡得稻田七畝焉卽翻土表之後

養素堂文集

卷九

六

卽有康年淳于操豚之時不爲奢願爰乃栽柳以固岸樹
桐以取膏樞棗栗以供饋遺種木絲以資衣服風雨之夕
灌溉之晨罔不在茲以企收內蓋終歲而勤動始俯仰有
蓄事也然當蛾賊倡亂虺毒陸梁腥染壻水烽迷聽山軍
慘於蟲沙戶絕夫炊爨吾恐黃牛再熟之稻鞠爲茂草黑
水魚池之田躡爲戎場矣何以戈鋌彗雪焚掠徹地畛畷
依然廬舍如故非善人之遺澤賴蒼昊之陰祐與今一山
有列佐於朝宜蜚名於世而乃嬾踐東粵之塵高卧南岐
之野言尋斯趙之所恍聞叱犢之聲則悽然以悲肅然而
散况復母氏餉饁白髮風梳得不念劬勞頌聖善乎於是

護松篁築茅屋引泉流菰蔬圃服我先疇食我舊德鳩我
宗族保我屬區庶幾兩世之艱辛永述遵而不廢在咎龜
蒙箸書結宅於故鄉之壠畝周變精易負畚於先人之草
廬一山之守此墅也合軌往詰無忝所生豈徒衍相臺程
史之傳紹梁州美農之俗哉澍旣爲記復系之詩曰滄江
之南先墅在焉父菑子播乃成良田用遺後嗣有幹有年
豈無傭者不如我先江天未曉風雨淒然作若敢辭洪縻
牛牽兩蹏入水踏破蒼烟歲其有矣羞膳豐饒伊何人哉
古之懿賢予言不讐視樓衫篇

一山有棕移徑詩述
兩封翁之力田也

寓廬菰菊記

養素堂文集

卷九

九

歲在焉逢涪歎張子待銓都門下榻錢衍石侍御許雙丸
屢易兩鬢頓髣榮落驚心慨懷拊髀况乎秋之爲氣潭壑
悲填壯不如人功名薪積匏瓜天上繫莫濟川肯藉盤中
飛難食因招我叢桂欲向山棲懷人兼葭空望水止愁因
酒而轉劇倦把書而無聊門有擔菊呼而市之略得百本
列於階除綠葉紫莖紅苳青穎倭遲老圃之想髣髴東籬
之觀庶色侵衣鬱香歆鼻於是繙正則之辭展致能之謚
挿屨光而顛舞傾浮蟻以狂歌天識旅情返冰魂而倚影
人畏秋瘦吸漙露以晚顏豈非散愁之禁方延齡之珍劑
乎嗟夫光陰激矢天地遽廬蘭以芳殘芝因秀折空辜九

日誰是百年滿堂美人雖目成而不識盈耳妖曲卽梁繞
而終停何若或寒萼終古無絕煌煌翠蒂晚節獨畱故
國松筠不榮化蝶之夢滿城風雨竟斷催租之人耶回憶
鶯囀亭前在黔之遵義縣署天涯石畔成都坊名栽曾百畝秬亦

千叢遠性風疏逸情霜傲婆婆偶寄躑躅長畱憐小草之
救時埽秋穽而無迹今則久荒三徑猶折元亮之腰空說
兩開欲涸杜陵之淚心蓬閉塞肘肘支離未免不採之傷
那禁背明之感所幸節到重陽尙消災於桓景鉏求一束
求助術於彭篋葛三能仙莫嫌惹亂歐九不學尚戲金瓢
亦足炫張仲之蓬蒿盈陶令之把握供成公之嘉頌入稽
養素堂文集 卷九 三

寓瞻園記

辛卯春季舟泊金陵同誼陸君瞻園舍我時則風光駘盪
日色暄妍嬌鳥弄嘯濃芳吐蘂亂紅鋪地眾綠掃天隋石
學山方池嵌鏡樓臺高下亭榭參差偃蓋擎松籊龍抽竹
緣階碧草襯我芒鞋繞卽青山入我衿裊琇胸天小澀浪
地平光景流連信可樂也乃有園丁鉏菜奴子摘蔬瀹茶
品泉磨墨試研樓頭擣遂樹根讀書清脆鴿鈴雲端風送
甘酣蜂蜜檐際日烘壁忝蛇醫衝破蛛網墻菴雀敲糞污

蝸涎飛虎拏蠅小雞啄蟻螭冠蛱蝶翠銜魚靜觀得之
良亦鵬爾時或廣庭久坐曲檻旁依蟾蜍月來蛞蝓星上
清見睂髮涼襲衣裳烏鵲獨飛蛩蛩自語銀河耿耿欲汎
仙查玉闕迢迢冀聽羽曲麗譙鼓繁砒室鐙明鄭酒百杯
說狐談虎蕪香一炷佞佛證仙僕倦酌牀客劬聞櫟大笑
捐別明日重來又或拭几觀書南嚳評画商部楹語觀史
對經心蘭出所藏史道鄰先生所書斗酒經新建芳儀拊
膺抱邨又出王陽明先生真容葉拱而起景仰良殷彼狗
苟蠅營徒爲順涿狐神鼠聖自覺顛狂白眼頻望青萍欲
所王戎儉父買李鑽核祖約贅人掩幔持籌殊爲赧顏不

養素堂文集

卷九

三

足置齒也嗟乎光陰逆旅天地剝削奸權塵埃聖賢日月
何論軒輊乃壽旗幢况以腐儒又同窶子療飢煮字撥禍
吟詩氣總陵雲朋乃墮雨精消燭苕貧甚黔婁反裘負薪
遺金不拾拂龜端筴卜居何期詰旦張帆便爲陳迹佗年
伯夢何異蘧廬倚裝操觚用紀鴻爪云爾

養素堂文集卷十

荃威張 澍介侯

考一

九丘考

左傳楚靈王稱倚相能讀三墳五典八索九丘八索之說後儒多言之獨未有考及九丘者吾嘗讀山海經而得之海內經曰南海之外黑水青水之間有若木有鹽長有九丘以水絡之名曰陶唐之丘叔得之丘孟盈之丘昆吾之丘黑白之丘赤望之丘參衛之丘荃夫之丘神民之丘其數適九謂非古之九丘乎郭注陶唐堯號昆吾此山出名

養素堂文集

卷十

一

金尸子云昆吾之丘荃夫此山出美石神民言上有神人餘無注愚竊以景純之注疏畧無當也蓋此九丘皆以古帝王棲止得名陶唐人習知之叔得當卽叔歆叔歆顓頊之子孟盈宜作蓋盈古天子號循蜚紀蓋盈氏若水之間禺中之地有蓋盈之丘是其墟也淮南子昆吾在南方注云祝融之孫陸終之子爲夏伯亦見大戴禮帝繫篇黑白或是黑齒爲黃帝之子孫一云姜姓帝俊之裔見大荒東經參衛或是參胡世本陸終子曰惠連是爲參胡赤望或卽赤誦爲赤松也黃帝臣一云炎帝之師或又以爲赤奮若潛夫論云天地開闢爰有神民民神異業精氣通行一

曰神皇氏春秋命祚序云神皇氏駕六蜚鹿政三百歲文選天台賸注作神人者避唐諱耳郭璞注之神人亦當作神民猶之言長畱之山其神白帝少昊居之渤海山神蓐收居之也嗟夫本人名居此山山以之名出美石亦以名之在長沙又或爲蒼羅青要之山神蒼羅司之蒼羅古國名存羿之賢臣亦名爲蒼羅非此夫黑白赤望嗟夫余雖有妄測而古籍散逸究莫由質實矣噫成鳩大忌果是何代之皇大訓九原卻在姁氏之世竊謂夏后平水土時存堅化益諸人乘蹻周流匡贊之暇作爲此書耳觀今文尚書大禹謨之上闕汨作九共書序云共九篇大傳引九共云

養素堂文集

卷十

二

予辯下土使民平平使民無傲據此爲地理之書無疑劉原父以九共卽九丘丘與共字形相近其說爲是孔安國曰仲尼述職方除九丘又云九丘者九州之志左正義曰丘聚也言九州所有土地所生皆聚此書也夫九州禹貢旣言之矣何又有書張衡云九州周之九州夫周之九州而列於唐虞之書哉衡又云九丘周礼之九刑丘空也空設也馬融亦言九丘九州之數悉無佐證未可依據或又以丘爲區如鬼容區爲鬼與丘賈逵曰九丘爲九州丘國之戒其說皆非也明明有九丘而乃以九州當之可乎

孝經援神契云舜生於姚虛卽東郡也括地志云姚虛在濮州雷澤縣東十三里會稽舊記云舜上虞人去虞三十里有姚丘卽舜所生也周處風土記云舜東奄之人生姚丘括地志又云餘姚縣有歷山舜井又有姚虛云生舜處也然考元和志云滹沱水出河東縣南雷首者卽書所謂釐降之所括地志云媯州有媯水源出城中耆舊傳云舜釐降二女於媯沔之所水經注云幹橋東北有虞城堯以女嬪於虞之地顧野王云越州餘姚舜後支庶所封舜姚姓故曰餘姚酈道元云虞濱西三十里有虞山餘姚縣西七十里有濠上虞故縣太康地記謂帝舜避丹朱於此故

養素堂文集

卷十

三

縣北有百官橋一曰舜橋也是濮州河東媯州越州皆非舜所生之區矣世本云饒內舜所居一佗媯虛帝王世紀佗姚虛杜岐公曰饒內卽周語之贏內音媯沔濠書地理志濠中郡西城下注應劭曰世本媯虛在西北舜之所居水經注引世本云舜居媯沔在濠中西城縣或言媯虛在西北舜所居也或佗姚虛路史引世本云媯虛在西城西舜之居潁容釋例亦謂舜居西城西濠地理志右扶風陳倉有舜帝祠初學記云西城故城云有虞舜祠實因生育之鄉廟貌祀之以著地靈耳蓋舜母握登見大虹意感而生舜於姚虛因生以爲姓故世本又曰帝舜姚姓也而許

慎亦云虞舜居姚虛因以爲姓至胡公滿周乃賜姓媯張
守節謂瞽叟已姓媯非也皇甫謐以舜居虞地以虞爲氏
亦誤虞思猶姓姚矣然姚虛在西城而今安康有姚虛者
西城本魏之安陽縣晉太康初改爲安康故皇甫謐云安
康謂之媯虛或謂之姚虛也通典金州西城縣有媯虛原
舜生於姚虛因上世采地在虞徙居之遂漁於濟陰之雷
澤作什器於成陽蒲州之閒就時於衛之負夏耕於齊之
歷山孟子遂以東齊之人目之耳若長沙之媯水因巡狩
駐驛而名下雒潘城之媯又予王契所受封俱無與於有
繇矣後漢鄭弘上書云舜生於姚虛信爲腐說彼司馬子
長以舜爲冀州人得毋據其所遷者而稱之乎水經注旣
引世本之言西城媯虛爲舜居又云漢水東歷姚方蓋舜
後枝居地故畱姚稱前後矛盾矣

有媯考

呂氏春秋云有媯氏二佚女搏燕覆以玉筐得遺卵二女
佯歌始爲北音史記云契母簡狄有媯氏之女三人行浴
見乎鳥墮卵吞之古史考云有媯氏與宗婦三人浴於川
列女傳云簡狄有媯氏之長女也與其妹娣浴於乎丘之
水宋羅長源謂乎丘之水卽晉丘之水今浚儀清丘一曰
乎池樂史寰宇記亦謂媯女簡狄浴於晉丘之水有乎鳥

遺卵吞之卽青丘之乎池然淮南子墜形訓云有城在不
周之北長女簡狄次女建疵相與浴於乎水余按乎水卽
今張掖之黑水故太平御覽引張掖記云黑水出縣界雞
足山亦名乎圃昔有城氏女簡狄浴於乎止之水卽黑水
也若馬遷言桀敗於有城之虛張守節正義謂有城在蒲
州蓋東邊旣爲帝嚳所娶處於陝號之簡本其所生錫名
此地以寓懷土之意猶之女嬀生於巴郡而九江壽春有
山姜嫄育自荏功而章丘龍蟠有跡皆因游止之蹤而稱
之非其實也楚辭天問云黑水乎趾三危安在乎趾卽張
掖記之乎止止與趾同故詩麟之趾古佗止左傳舉趾高

養素堂文集

卷十

五

漢書引佗止高誘曰止足也鄭注士昏礼曰古文止佗趾
也而離騷經序西游言白水卽河圖所云崑侖山出五色
水其白水入中國名爲河也言蘭風卽水經注所言崑侖
之上有樊桐乎圃增城蘭風也言豐隆卽穆天子傳所云
天子升於崑侖觀黃帝之宮而封豐隆之葬也言窮石卽
淮南子所云弱水源出窮石山括地志所云蘭門山一名
合黎山一名窮石山也言洧盤卽郭景純注山海經引禹
大傳云洧盤之水出崦嵫山十道志味谷在秦西縣南名
兌山一曰奄茲也而又繼之曰望瑤臺之偃蹇兮見有城
之佚女瑤臺卽呂不韋所謂九成之臺者則有城之在不

周斷斷無疑路史謂有城在西方去岱都太遠不知黃帝都彭城纍祖乃出西陵高辛居殷亳慶都乃產常羊苟屬絲繡千里典雁豈必望衡對宇始結昏媾哉宋書符瑞志言簡狄以春分乎鳥至之日從帝祀郊禘有予鳥銜卵而墜簡狄吞之孕生高歐陽修蘇洵皆謂無吞卵之事按秦本紀云女脩織紉鳥隕卵女脩吞之生子大業則吞卵者不止簡狄矣亦豈在春分日哉古人誕降恢奇不常否則履巨人跡生民詩之敘姜嫄豈嚮壁虛造乎

塗山考

晉太康三年地記古當塗國夏禹所娶也西南有禹邨今

養素堂文集

卷十

六

九江當塗縣有禹娶之地皇甫謐云今九江當塗有禹廟則塗山在江南世紀云塗山氏合昏于台桑之野鍾離西七十里卽當塗縣杜預云塗山在壽春東北輿地記謂卽禹所娶塗山氏國呂氏春秋云禹娶塗山氏不以私害公自辛至甲四日復往治水說文云九江當塗民以辛壬癸甲之日嫁娶云故江淮之俗以辛壬癸甲爲嫁娶日而吳越春秋越絕等書又云禹娶會稽塗山應劭云在永興北永興今蕭山也余按禹娶塗山乃蜀巴縣之塗山非壽春會稽之塗山也水經注云江州縣水北岸有塗山南有夏禹廟塗君祠唐銘存焉寧陽國志云禹娶于塗山今江州

塗山帝禹之廟銘存焉杜預亦云巴縣有塗山禹所娶山有禹王及塗后祠陶宏景水仙謚云塗山后帳天后翠幙指此東漢郡國志云塗山在巴郡江州爲重慶巴縣至今洞曰塗洞邨曰塗邨灘曰遮夫后曰啓母也酈善長庾仲雍竝以爲禹娶於江州之塗山夫禹之娶于蜀豈獨以生于蜀哉蓋其祖昌意爲黃帝次子娶蜀山氏昌僕生帝顓頊乾荒亦娶蜀山氏淖子禹之不得遠締姻也亦人情矣當塗山氏遠適鳴條思戀本國築乃清臺還望蜀土猶陝虢峙有娥之虛章丘畱姜嫄之跡而會稽爲計功之地壽春爲大會諸侯之所均非賤雄狐九尾之處矣顏師古漢

養素堂文集

卷十

七

書注引淮南子云禹治洪水過轅轅山謂塗山氏曰欲餉聞鼓聲乃來禹化爲熊跳后誤中鼓塗山氏來見禹慚而去嵩高山下化爲后禹曰歸我子后敝北方而生啓夫禹治水詎無官師役徒何至使后持饁如田家婦其謬不待辯而嵩陽啓母廟前有高二丈中裂之石益爲無稽且旣爲后矣登封之臺又何爲者考盧元明嵩高山記昔陽翟有婦人孕身三十月乃生子從母嵩山五歲偃入此山學道神明爲母立祠因號曰啓母后是嵩高之祠非高密之配從以同爲啓母因疑相混也倦游錄云三門禹廟神儀侍衛極肅後殿一氈裘像侍衛皆胡人云是禹婦翁呂氏

春秋塗山氏佗歌以俟其伯姬是塗山氏有姊也又云禹省南土塗山氏之女令妾待禹于塗山之陽是禹有妾也楊炯少姨廟記澤地理志嵩高少室之廟其神爲婦人像故老相傳啓母塗山氏之妹是塗山氏有妹也孔緯含文嘉云禹盡力溝洫百穀用成天降玉女一佗天降聖姑聖姑未知卽指塗山氏否若世本言塗山氏名女媧連山易言塗山氏名攸女古今人表言名女魋大戴礼吳越春秋廣雅佗女嬌一佗女嬌云

南巢考

山海經成湯伐夏桀于章山呂氏春秋未接刃而桀悉逐

養素堂文集

卷十

八

之至大沙墨子湯放桀于大沙史記桀敗于有娥之虛犇于鳴條湯伐三鬯逸周書成湯將放桀于仲野桀去之不齊又之魯而後奔南巢帝王世紀湯放桀于歷山與妹喜眾妾同舟浮江奔南巢之山而死淮南子湯以革車三百乘伐桀南巢放之于夏臺竹書紀年帝癸三十一年商師征三鬯戰于郕呂氏春秋亦云獲桀于焦門放之于南巢殷成湯二十季桀卒于亭山荀子同禁絃歌舞是桀奔放死卒之地

言人人殊余反覆稽考則無不合蓋湯初與桀戰于有娥

之虛

在蒲州

又與韋顧拒湯于莘桀敗奔于鳴條在蒲州安邑縣蓋鳴

條有二陳西平巨縣有鳴條亭東鳴條也蒲州安邑縣有鳴條陌西鳴條也東鳴條舜之卒地西鳴條爲桀所奔者

史記所言是也湯又敗桀于歷山在齊卽左傳之歷下桀走之章山

湯又伐桀于章山名大沙見山經郭注在江夏竟陵今鍾祥縣界古文以爲內方山山海

經呂氏春秋墨子所言是也桀于是同妹喜眾妾同舟浮

江奔南巢之山帝王世紀所言是也湯又以革車三百乘

伐桀于南巢戰于郕在兗州泗水縣淮南子竹書紀年所言是也

湯又獲桀于焦而囚之淮南子竹書紀年所言是也後

桀卒于亭山卽焦湖中之山亦竹書紀年所言是也弟有可疑者

淮南子旣云放之夏臺矣又云整兵鳴條困夏南巢譙以

其過放之歷山若歷山卽在南巢者而與世紀所云敗歷

山始浮江奔南巢者不合淮南子之歷山尸子亦云放之歷山非也當

養素堂文集 卷十

九

伯亭山爲是高誘注爲歷陽之山非且夏臺路史伯均臺一作重泉在馮翊桀昔以

之囚湯今仍以之放桀本欲箸出爾反爾之報遂不顧道

里之迂回矣蓋大沙章山鳴條仲野三腹歷山有娥皆爭

戰之所非放地也放地以今之巢縣爲確括地志亦云而李宏

憲元和縣志謂楚有二南巢一在廬江六縣一在彭澤縣

東四十二里桀所奔之南巢在彭澤誤矣夫桀之奔于巢

蓋依巢伯也李氏旣以廬州之巢爲古巢伯之國而復以

南巢爲非桀所奔地何矛盾之甚耶輿地志巢縣臥牛山

有桀王城晉地理志注云桀死于此今巢縣有巢湖亦名

焦湖焦巢聲相近前漢地理志沛郡有譙縣卽巢縣也淮

南子之焦門亦卽巢門呂氏春秋當在焦湖之閒也晉志

以焦爲又考紀年築伐岷山氏得二女曰琬曰琰刻其名路史

于苕蕩之玉而棄其元妃于洛元妃卽妹喜也芻午倉卒之時安得與妹喜同乘舟乎此皆係譌傳者

曲江在廣陵考

按浙江一名漸江山海經云浙江出三天子都水經作漸江出三天子都注云卽浙江也虞喜云今錢塘江口浙江正居江中潮水投山下折而曲一云江有反濤水勢折歸也盧肇云浙者折也蓋取其潮出海曲折而倒流也亦名淞河莊子所謂淞河之水有吞天沃日之勢謝康樂云淞

養素堂文集 卷十

十

河之水栖遲山澤是也又名曲江曲乃折之謂也見郡縣釋名然枚乘七發所云八月觀濤於廣陵之曲江自在今之揚州故蕭子顯南齊書州郡志云廣陵爲兗州鎮瀋故王國土甚平曠有江都浦水刺史每以秋月多出海陵觀濤與京口對岸江之壯濶處也蓋海陵卽廣陵則非杭州之羅刹江可知朱氏彝尊旣信錢惟善之妄言近人洪震暄遂謂丹徒大江終古無濤尤屬謬戾按山謙之南徐州記云京江禹貢北江也濶漫三十里通望大壑常以春秋朔望輒有大濤聲勢駭壯極爲奇觀濤至江乘北激赤岸尤覆迅猛京江卽京口丹徒江今之鎮江何以云無濤又

南苑州記云瓜步山東五里有赤岸南臨江中潮水自海入江衝激六七百里至此岸側其勢始衰卽郭景純江賦所云鼓洪濤於赤岸淪餘波於柴桑也亦卽枚乘七發所云凌赤岸簪扶桑也江賦注赤岸在廣陵輿縣樂史云赤岸山在六合東三十里高十二丈周四里土色皆赤因名夫觀濤廣陵厥有明證安得以浙江亦名曲江遂嫁之耶

又按始興郡有曲江今韶州也漢司馬相如弔秦二世臨臨曲江之醴州在長安以其水曲類廣陵之江今樂游園是已

浙江卽漸江非岷江考

浙江之名始見於海內東經經云浙江出三天子都水經

養素堂文集

卷十

二

云漸江水出三天子都注云山海經謂之浙江近日謝江洪震暄輩謂浙江卽岷江非漸江其說疏甚按郭注山海經引地理志云漸江出新安黟縣南蠻中東入海今錢塘浙江是黟卽歙也司馬彪郡國志云浙水出丹陽黟縣南蠻中劉昭補注卽引郭說山海經又云浙江在閩西北入海顧野王玉篇云浙江發源東陽新安之閩不與岷山之江相涉至錢塘入于海酈道元水經注亦云蓋浙源出於黟縣江源出於岷山有劃然難合者顧野王恐人認岷江爲浙江故特箸之曰不與岷山之江相涉也以曉之或曰許叔重說文旣云漸水出丹陽黟縣南蠻中東入海又云

浙江水東至會稽山陰爲浙江晉灼灋書注皆云江水至會稽山陰爲浙江言岷江水至會稽爲大江之流也不知叔重所云江水卽浙江之水也猶嚮字下云周燕也周與大字嚮連讀言嚮周乃燕名也偃字下云佺仙人言偃佺與大字連讀參字下云商星也連大字讀言參商皆星非以參卽爲商星亦如河字下云出敦煌塞外昆侖之例此亦當連浙字讀若不與浙字連讀則說文漸字下云水出丹陽黟南蠻中東入海是果何水乎說文此例甚多可爲左證又云江水至會稽山陰爲浙江者蓋初出名漸江至會稽山陰其流曲折乃名之曰浙江也豈必如程泰之言

養素堂文集

卷十

三

岷江始稱爲江哉夫浦陽江松江亦固稱江矣卽盧江延江亦未嘗岷江之水亦且稱江矣卽說文洊湔沫三水皆別出者亦稱曰江矣必謂浙江爲大江之流乃得名江是不知莊子之呼洊河也或又謂浙卽是漸說文不當浙漸出不知浙字下注云江水東至會稽山陰爲浙江者言浙江之所由名漸字下注云水出丹陽黟南蠻中東入海言發源之所出及其歸宿也許叔重之旨與善長相符水經注浙江出南蠻中不與岷江同信矣且漾水亦卽灤水也說文既有漾又有灤復何疑乎或又謂浙江卽禹貢三江之南江則大不然初學記引鄭康成說左合灤爲北江

右會彭蠡爲南江岷江居其中則爲中江是浙江固非南江也或又以鄭說爲僞然班氏地理志於毘陵縣下云北江在北東入海於蕪湖縣下云中江水出西南東至陽羨入海吳縣下云南江在南東入海皆揚州川亦未以浙江爲南江也郭景純雖以岷江松江浙江爲三江而于山海經注又云岷山大江所出嶺山南江所出嶠山北江所出其說又自差互何以定浙江之必爲南江乎然旣云岷江又云浙江則固二江矣卽爾駟十三州志云江水至會稽與浙江合是黟縣所出之漸水至會稽合浙水也其言最爲分曉竝非岷江水合於浙水也漸水至山陰卽名浙水

養素堂文集

卷十

三

原一水也故酈道元引地理志云江南枝分歷烏程縣南通餘姚縣則與浙江合亦與鬪氏之說符又以見南江之在吳縣也元和郡縣志亦云漸江一名浙江源出休寧縣東南橫鄣山東流經歙縣又東南入睦州界又東北流入於海合之景純善長之言漸之爲浙無疑又唐六典浙江有三源一出歙州一出衢州一出婺州歷睦杭越三州界入海按今地理志蠻夸中唐盧播引伯率山以解山海經之率山樂史寰宇志引山海經云漸江出三天子都在率東御覽引地理志亦伯率中羅端良新安志云率山在休寧縣東南四十里高五十七仞二十一里率水出焉是

伯蠻中者字譌也古率字伯蠻因形近而譌或曰浙江在
三代時本爲蠻夸地後人諱之改爲率中耳

三江考

班固漢書地理志會稽吳縣下云南江在南東入海毘陵
縣下云北江在北東入海丹陽蕪湖縣下云中江出西南
東至陽羨入海皆揚州川也徐堅初學記引鄭康成書注
云左合滙爲北江右會彭蠡爲南江岷江居其中爲中江
水經沔水下引郭璞云三江者岷江松江浙江也又郭氏
山海經注云岷山大江所出也岷山南江水所出也岨山
北江水所出也韋昭國語注云三江松江錢塘江浦陽江
養素堂文集

卷十

古

也酈道元引庾仲初揚都賦注云今太湖東注爲松江下
七十里有水口分流東北入海爲婁江東江入海爲東江
與松江而三也晉顧夸吳地記亦同此說徐鍇說文繫傳
云江出岷山至楚都名南江至潯陽爲九道名中江至南
徐州名北江入海後孔穎達主班固陸德明兼舉韋昭顧
夸而無所專主蘇軾主鄭康成蔡沈主顧夸庾仲初楊慎
歸有光主郭璞曾攷程大昌易祓近世胡渭主蘇軾聚訟
紛紜將何以折衷乎介侯氏曰蘭臺之言是也彼東坡言
江自豫章入彭蠡而東至海爲南江自岷山至於九江彭
蠡入於海爲中江滙過三滙大別入江會彭蠡爲北江者

卽鄭君說也夫江漢會於漢陽合流數百里至湖口而後與豫章江會又合流千餘里而後入海不復可指爲三矣且沔漢爲荊州川與揚無涉蔡氏闢之良是但九峯從庾仲初說大江不與以爲費疏鑿者雖小必記無施勞者雖大亦畧稽諸管子荀子淮南子皆云禹疏三江言三江卽有大江而謂未施功乎又蘇松一隅不足跨吳越也至韋宏嗣之說可以注國語不可以解禹貢何也酈道元水經注云浙江于餘暨東合浦陽江是浦陽錢塘湊濤入海而韋氏彊分爲二矣郭景純以岷江松江浙江爲三江較韋說爲長然松江乃震澤之下流浙江爲禹功所不及而以

養素堂文集

卷十

五

松江爲中江浙江爲南江與導水之文不合又山海經注三江皆在梁州之域夫東爲北江中江皆在彭蠡以下用修何竟昧諸周禮職方氏云揚州其川三江惟孟堅地理志於北江中江南江俱曰揚州正與職方相符意以爲職方明則禹貢亦明也顏師古卽據此以詁禹貢之三江最爲眞確卽孔安國尚書導漾傳云自彭蠡江分爲三入震澤遂爲北江而入海正義云言三江共入震澤復分爲三此水遂爲北江而入于海導江傳又云有中則南可知孔傳實與班固說合而胡東樵詆之矣矣桑欽水經云沔水與江水合流又東過彭蠡澤又東北出居巢縣南又東過

牛渚縣南又東至石城縣分爲二其一過毘陵縣北爲北

江其一爲南江東與貴長汝水合

近時戴吉士震校本云當于東過彭蠡澤下改

云又東至石城縣分爲二其一東北流又東北出居巢縣南又東過牛渚又過毘陵縣北爲北江其一東北至會稽餘姚縣東

入于海酈道元注水經遵依班氏但其援引地理志以震

澤爲南江以過烏程縣南者爲南江之支流則失之誤會

考班志於吳縣下云具區澤在西南江在南於石城下云

分江水首受江東至餘姚入海在吳縣南者言其中閒所

經歷自石城至餘姚入海者言其首尾是分江水與南江

爲一事而震澤不同也酈氏於中江無所考牕明謂溇魏

閒蕪湖水已不復東故水經有北江南江而無中江儻以

養素堂文集

卷十

六

此夫後之欲尋三江故蹟者舍班氏之說猶之濟鴻波而棄舟楫亦徒望洋而嘆耳

九江考

史記太史公曰余登廬山觀禹疏九江淮南子云禹鑿江而通九路溇書地理志九江今廬江尋陽縣南皆東合爲大江應劭云江自尋陽分爲九郭璞江賦云流九派乎尋陽嗣後說者皆以爲九江在尋陽矣故元和志云江州尋陽郡禹貢揚荆二州之境揚州云彭蠡既豬今州南五十里彭蠡湖是也荊州云九江孔殷今州西北二十五里九江是也亦是遵前人之說而尋陽記蚌江三日烏江四

曰嘉靡江五日缺江六日源江緣江圖一曰三里江二曰
七日廩江八日提江九日白蚌江六日白鳥江
江四曰鳥土江五日白蚌江六日白鳥江
江七日簡江八日沙提江九日廩江復備列其名世遂

据以解禹貢蓋牢不可破矣今按經云過九江至於東陵
今巴陵也夸陵名西陵故此為東陵儻使九江在尋陽則

江至沙羨不迤北而行顯與經違矣山海經云洞庭之山

帝之二女居之是常游於江淵澧沅之風交瀟湘之浦是

在九江之閒出入必以飄風暴雨是九江在洞庭之證也

而楚地記本之張勃吳錄云岳之洞庭荆之九江也水經

注云九江在長沙國下嶠縣西北乃今岳之巴陵洞庭在

其西北是九江為洞庭湖斷斷無疑朱子嘗考定九江源

養素堂文集 卷十

七

委為瀟出道州營道縣九疑山亦名湘出安靜府興安縣

東北至潭營水過零陵下與湘江相合出五陽山東北名鑄嘴

州入洞庭蒸諸原而下合於湘資出五陽山東北入洞庭沅出

州西蠻界中至漸流出索縣東序一伯敘出辰州敘浦縣辰

辰州與西江合漸流出索縣東序一伯敘出辰州敘浦縣辰

中東流與西水合沅合沅北流至鼎州東合洞庭之九水

蔡九峯書傳有元元當低無即無澧而無瀟蒸後漢志伯承

承縣北東注於湘曾氏攷亦以為沅漸無辰敘西湘資

澧九水皆合洞庭中東入於江也而水經所云湘資沅微

洞庭之即此五水也羅泌引十道四蕃志云江自鄂陵分

派為九於此合流謂之九江口亦即張須元始於鄂陵終

於江口會於桑落洲之說太康地記引劉歆說謂湖蘩八水入彭蠡澤爲九江者自又一說考之史秦始皇滅楚以其都壽春而因置九江郡後王莽改豫章曰九江郡改柴桑縣曰九江亭是今九江府之所由名也安得以新室所大郡縣之名遂据之以解經乎

震澤考

禹貢震澤底定孔傳云震澤吳南太湖名山海經浮玉之山北望具區郭注云太湖也爾雅十藪吳越之閒曰具區注云具區今吳縣西南太湖卽震澤班氏地理志云會稽吳縣具區在西古文以爲震澤余按具區震澤太湖五湖

養素堂文集

卷十

六

雖四名其實一也左傳越伐吳吳禦之笠澤笠澤亦卽震澤越語句踐之地西至於姑蔑韋昭注今太湖是是姑蔑亦震澤之別名而葉夢得以孔傳爲非孔仲達正義云餘州浸藪各異而揚州浸藪同處論其水謂之浸指其澤謂之藪此言是矣其謂之五湖者張勃吳錄云五湖者以其周行五百里故名虞翻云太湖東通松江南通雲谿西通荆谿北通太湖東南通韭谿凡五道故謂之五湖韋昭云五湖者胥湖蠡湖洮湖澇湖就太湖而五實一湖也陸龜蒙云太湖上稟咸池五車之氣故一水五名藪而論之仲翔宏嗣之說爲長張勃魯望雖名稱各殊道里互別皆在

太湖上下二三百里之闊唯李善以洞庭彭蠡震澤巢湖
鑑湖爲五湖司馬貞以具區洮滬彭蠡青草爲五湖以荆
州之水爲揚浸自屬差戾今按湖亦自有五名自莫釐峯
之東與徐侯山相值者中爲菱湖莫釐峯之西北與菱湖
連者爲莫湖南通莫湖東逼胥口者爲胥湖長山之東曰
游湖長山之西北連無錫老岸曰貢湖別有金鼎湖梅梁
湖東皋里湖其浸則通謂之太湖至其言廣狹亦多不同
越絕書云太湖周回三萬六千頃水經注引韋昭云方圓
五百里盧熊蘇州府志引顏真卿石柱記云四萬八千頃
王鏊姑蘇志云東西二百餘里南北一百二十里占蘇常
養素堂文集

卷十

九

松三州蓋廣狹之數因乎時之旱潦且古今宣洩異制自
不同耳若孔傳班志皆謂在吳縣西其說非是鄭氏周禮
注謂在吳南者得之

泂柯江考

十三州志云泂柯者江中山也水經注云泂柯江中兩山
名異物志泂柯繫船棧也其山在海中小而高可以繫船
俗人謂之越王泂柯遠望甚小石高不似山望之似爲一
株樹在水中也班史以泂柯爲楚莊豪伐夜郎桡船處漢
初卽於是地置泂柯郡特以地界荒服桑欽酈道元輩未
嘗一問津宜其於江流原委畧而不詳後之人或以烏蒙

七星關水當之或以烏撒之盤江當之或以定番之濛潭當之而總未覈也夫七星關之水固東出烏江不注可渡河矣可渡源發金沙江來自吐番由雲南之麗江塏城關入中國經鶴慶姚安東川峯定諸府至四川之敘州與岷江合入於東海非若盤江之從粵入南海也且盤江兩山夾峙波濤湍盪蛟龍魚鼈之所不窟而謂可操舟耶若定番之濛潭雖注泗城州而入粵而不能入番禺且涓滴流也亦與史記所記廣數里者不符吾聞唐蒙之風諭南越也蓋嘗蹤跡之以爲夜郎臨牂柯江矣帝遂拜爲中郎將從巴蜀筰關入因見夜郎侯多同聽蒙約束還報以爲

養素堂文集

卷十

三

犍爲郡發巴蜀卒治道從犍道指牂柯江今播州夜郎地也犍道又與播近則牂柯江卽烏江無疑余縮符遵義至城北九十里有蒙渡橋爲黔蜀要路父老傳其卽唐蒙發卒治道處云常璩南中志云談指縣有不津江江有瘴氣校不津江卽今之丹江源發城南高坡又抱朴子謂牂柯有沈羽之流不知當今何水也

豚水考

海內東經云鬱水出象郡而西南注南海入須陵東南按鬱水卽豚水也漢地理志云牂柯郡夜郎豚水東至廣鬱又云鐔封溫水東至廣鬱入鬱又云鬱林郡廣鬱鬱水首受夜郎豚水東至四會入海水經云溫水出牂柯夜郎縣

又東至鬱林廣鬱縣爲鬱水又東至領方縣東與斤員水合東北入於鬱注云鬱水卽夜郎豚水也又按豚水亦卽牂柯江水寧陽國志云牂柯江水出南徼之東通四會至番禺入海是鬱水卽豚水豚水卽牂柯江水審矣牂柯水卽鬱林江卽駱越水亦名溫水也豚字班氏西南夸傳作遯蓋字通也遯又作遂故歸匪易遯卦之遯作遂山海經豚作逐郭注逐古豚字校逐當作遂易之彖爲豨神豨卽大豕也可知逐之宜爲遂矣

廢牂柯郡考

漢元鼎六年平且蘭遂平南且置牂柯郡後置益州以牂

叢素堂文集

卷十

三

柯屬焉始元二年分天下爲十三都荏陵屬荊州都牂柯屬益州都後漢州郡因之晉永嘉二年分牂柯太平且夜郎二郡劉宋時牂柯平且夜郎屬寧州隨開皇初置牂柯郡廢荏陵爲朗州大業初復置唐荏德三年以牂柯首領謝龍羽地置牂州貞觀元年以隨之牂柯縣置朗州杜祈置恭水高山貢山郭施柯盈釋燕六縣九年以隨牂柯郡之牂柯縣置播州今平越所轄數處卽故郡地也按牂柯字形各書不同前漢作牂柯後漢作牂柯常璩寧陽國志亦作牂柯隨志作牂柯郭忠恕作戔戔韻書作棧柯或作椿柯亦作戩戩然漢書西南且傳及宋晉志俱作牂柯自

當以泮柯爲是

管子中匡篇有南至吳越巴泮柯之文是泮柯春秋時已有或係後人增會

苟扁洞考

今永豐州之羅斛東六十里有洞在山巔寬敞幽僻人跡罕到相傳葛洪鍊丹於此余按葛洪本傳洪以平老欲鍊丹以祈遐壽聞交趾出丹求爲苟扁令至韶州爲鄧嶽所畱不得逞乃止浮羅山修鍊是稚川未嘗至交州也何爲有藥竈之遺夫臨賀之石雷公磨刀湮州之堆夸父振履軒轅鑄鼎於鼎湖委波皆是重弩播琴於歷畔積阜都名大抵皆妄者所傳也

一統志句漏山在梧州府北流石峯一百從平川中特起其巖穴皆句曲爲是貴州羅斛雖與粵西接而不與北流相直志又云洞

養素堂文集

卷十

三

有三石室葛洪常修鍊於此又有丹竈八仙石則亦傳聞增會之言未質之本傳也

